

զատ կանանին, եւ նստուցանել աստի անտի ասպարիսին. եւ ինքն Շապուհ արքայ հեծեալ ի ձի, արշաւակի<sup>1</sup> անցանէր առ կանանովն. եւ որ յակն գային, մի մի ի նոցանէ պղծեալ ի խառնակութիւն տանէր առ ինքն: 9 Զանգի մաւտ յասպարէսն հարեալ էր խորանն, յոր առեալ մտանէր գործել զանաւրէնութիւն. եւ այնպէս զբազում աւուրս առնէր զայն ընդ կանայսն: 10 Եւ զազգն Սիւնեաց տոհմին զամենայն զայր ի չափ հասեալ կոտորեցին, եւ զկանայս սպանին. եւ զամենայն մանր մանկտիսն ներքինիս հրամայէր առնել, եւ խաղացուցանել յերկիրն Պարսից: 11 Եւ առնէր զայս ամենայն վասն վրիժուցն Անդուկայ, որ եղել պատերազմ ընդ Ներսէհ արքայ Պարսից:

12 Եւ տայր հրաման Շապուհ արքայն Պարսից զամուր ամուր տեղիսն Յայոց բերդս շինել, հրամայեաց եւ բերդակալս կացուցանել: 13 Եւ զազատ կանանին անդէն ի բերդեանն բաշխէր եւ թողոյր. զի եթէ ոչ արք նոցա եկեսցեն նմա ի ծառայութիւն, սպանցեն զկանայս նոցա բերդակալքն՝ առ որս եթող զնոսա: 14 Եւ եթող յաշխարհին զԶիկն եւ զԿարենն, զնոցա իշխանս զաւրաբ բազմաւբ. եւ զիշխանութիւն մնացորդացն ետ ի ձեռս Վահանայ եւ Մերուժանայ, եւ ինքն զնաց յԱտրպայական:

#### ԳԼՈՒԽ ԾԹ.

1 Յաղագս թէ իբրեւ մնացին Վահան եւ Մերուժան, թէ զի՛նչ շատ չարիս գործեցին ընդ երկիրս Յայոց. եւ կամ զիա՛րդ սատակեցան Վահան եւ կինն իւր յիւրեանց որդւոյն:

2 Այնուհետեւ Վահանն Մամիկոնեան եւ Մերուժանն Արծրունի, սոքա երկոքեան արք պիղծք<sup>2</sup> անաւրէնք էին, ապստամբեալք էին յուխտէ աստուածապաշտութեանն<sup>3</sup>, եւ զանաստուածն Մազդեզանց աղանդն յանձն առեալ պաշտէին. սկսան այնուհետեւ յերկրին Յայոց աւերել զեկեղեցիս՝ զտեղիս աղաւթից քրիստոնէից յամենայն կողմանս Յայոց՝ զաւառաց զաւառաց եւ կողմանց կողմանց: 3 Եւ նեղէին զբազում մարդիկ՝ զոր ի բունն արկանէին, թողուլ զաստուածապաշտութիւն եւ ի պաշտանն դառնալ Մազդեզանցն: 4 Եւ յետ այսորիկ տային հրաման Վահանն եւ Մերուժանն, զամենայն կանայս փախուցելոցն զնախարարացն՝ որ թողինն եւ զնացինն, տային հրաման ի բերդեանն զի նեղեցեն զնոսա՝ դարձուցանել յաւրէսս Մազդեզանց. եթէ ոչ առնուցուն յանձն, սատակեցեն զամենեսեան չարաչար: 5 Եւ բերդակալեանն յորժամ զայն հրաման ընկալան, ամենայն ոք ո՛րք առ ումեք էին՝ նեղեցին զնոսա ըստ հրամանին տուելոյ: 6 Ապա իբրեւ ոչ մի ոք յանձն

1 Յօր. շաւակի

2 Օրինակ մի յաւելու՝ անագորոյնք

3 Օրինակ մի յաւելու՝ եւ ուրացողք